

Date – 25/09/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma chuan Grape Growers Society te chu an Grape leh Wine deh chhuah hralhna kawngah sawrkarin thahnem a ngaihpuh hle tih hre turin a chah.
2. Rajya Sabha MP Pu K Vanlalvena'n sorkar laipuiin kuhva chin a khap lo tih a sawi a, Mizorama kuhva chingtute leh chin zel tumtute tan mangan na tur a awm lo a ti.
3. Jammu and Kashmir Assembly inthlan thawhnhnihna atan vawiin khan vote thlak a ni
4. Asia Power Index tarlan danin India chu Asia-a ram thiltitheh pathumna a ni tawh.

<><><>

CM - WINERY

Chief Minister Pu Lalduhoma chuan Grape Growers Society te chu an Grape leh Wine deh chhuah hralhna kawngah sawrkarin thahnem a ngaihpuh hle a ni tih hre turin a chah.

Vawiina Champhai Grape Growers Society Winery, Tlangsam, a tlawh naah Society hotute nen inkawmin Chief Minister chuan an thilsiamte awmze nei leh hlawk zawka an hralh theih nan hma an la dawn a, grape chauh ni lovin thlai dang atanga siamchhuah thilte pawh an ngaihtuah tel dawn tih a hrih a, hei bakah hian Mizoram sawrkar chuan flagship programme - ‘Bana kaih - Hand Holding Policy’ hmangin kuthnathawktute khai chhuah a tum mek a, he policy hnuaia hamthatna te pawhin an mamawh dan a zirin an dil thei tih a hrih bawk.

Champhai Grape Growers Society hotute hian Chief Minister hnenah hian Grape Wine an tharchhuahte hlawk zawk leh zau zawka an hralh chhuah theih nan sawrkar hmalakpuina an lo ngen a. Grape Wine chu food item a nih anga zalen taka hralh theih an duh thu leh License-Vendor system pawh mumal zawka kalpui an duh thu an lo hrih a ni.

Inkawmna hi Champhai Grape Growers Society Chairman Pu HS Vanlalfakzualan a kaihruai a ni.

<><><>

DISASTER

Vawiina chawl loa ruaha tlak hnuah Aizawl Bawngkawn leh Durtlang inkar kawng chu leimin leh lungtla vangin vawiin tlai atang khan a tlang rih lo va, lirthei eng chi mah tlan tlang theih ni rih lohin ruahsur vangin thenfai hna pawh thawh theih a la ni rih lo a ni.

Leimin avang hian motor leh mihring tangkhang an tam hle a, vawiin chawhnu lam, Sikul ban hma deuha min a nih avangin an zingah hian zirlai naupang pawh an tam hle ni a thudawn a ni bawk.

Indian Metereological Department Aizawl Center Director Sudheer Kumar Dwivedi-a chuan Mizoram kumina ruahitui a dawng tam tih sawiin naktukah pawh ruah a sur chhonzawm zel thei a ni a ti a, Kumin January thla atanga June thla thleng khan Mizoram pumah ruahitui milimeter 620 dawn a tla tawh a, a hun chhung inangah nikum khan ruahitui milimeter 600 vel a tla thung a ni.

Khawvel sik leh sa inthlak danglam nasa leh boruak lum chho zelah Mizoram pawhin kawng hrang hrangin a tuar chho ve a, global warming in a nghawng langsar zingah ruahsur dan hi a tel a, hmun hrang hranga ruahitui tlak dan a danglam nasa hle a, a thenah nasa taka a sur laiin, thenkhatin ruahitui an hmu tlem em em thung a, a sur danah pawh hmun thenkhatah a sur miah loh laiin hmundangah chuan a tla tam chi, leilung pawhin a tawrh phah theih hial khawp te in a sur thung a ni.

<><><>

CM - MZP ASSEMBLY

Chief Minister Pu Lalduhawma'n zofate hui khawma, inpumkhatna leh tanrualna lama hmalak chu sawrkar thil tum pawimawh tak zinga mi a ni a ti.

He thu hi vawiina Mizo Zirlai Pawl Assembly vawi 68-na, Champhai Tlansama Thanglianga Run a neih a hmanpuina ah sawiin Chief Minister chuan a pisa ah Mizo Diaspora Cell din a nih thu sawiin khawvel hmaa Zofate sang taka chawikan chu a duh ber ani tih sawiin hmun hrang hranga zofa te nen impumkhatna turin a tul anga thawh tlan zel a duh tih a sawi.

Pu Lalduhoma chuan Mizoram chu zofate himna kulh, thlamuang taka Zofate chen za theihna anih angin ngaihhlut a pawimawh a ti a. Chi peng inhungbikna khauh lutuka kalpui chuan min thendarh a, Zo hnahtlak hnam hrang hrangte chuan Mizo Hnam chhungah chi peng chu lungawi takin kalpui a, Mizo anga dingchhuak chak taka dingchhuak thei tura inlungrua a pawimawh tih a sawi.

Chief Minister chuan Mizo Zirlai Pawl chu Zofate huikhawmtu, Zohnahtlak unaute thlang hauhtu, chhiatna an tawh pawh a kantu leh tanpui hmasa thin tu an ni a ti a, ram leh hnam tana tha an thawh chhonzawm zel chuan Mizo mipui ten MZP an zah leh ngaihhlutna a pung zel dawn tih a sawi.

MZP General Assembly vawi 68-na hi nizan khan Champhai Tlansam a Pandal ah tan a ni a, Nimin kha Assembly palaite thlen kim ni a ni a, Chief Minister Pu Lalduhoma bakah hian Home Minister Pu K. Sapdanga leh Education Minister Dr. Vanlalhlana ten hun hran theuhah an hmanpui dawn a ni.

<><><>

POSHAN MAAH

Social Welfare & Tribal Affairs leh Women & Child Development Minister Pi Lalrinpuii chuan nimin khan Synod Conference Centre-ah POSHAN MAAH - Food Fair & Indigenous Toy Festival a hawng.

He hunah hian Anganwadi Centre-a naupang inzirtirna hmanrua insiamsiak a ni a, Mizo chaw hrisel hrang hrang leh thei hrisel chi hrang hrang phochhuah a ni bawk a. Anganwadi Centre-a naupang zirtirna hrang hrang Anganwadi Worker-te'n an entir bawk.

Minister Pi Lalrinpuii chuan naupang zirtirna leh chaw tha chu thil kalkawp tlat a ni, a ti a; eng anga enkawl thiam pawh ni se ei leh in hrisel an hmuh leh si loh chuan an hmasawna a khingbai ang a, an nih tur ang an ni dawn chuang lo, a ti a. Rualkhai taka enkawl a nih theih nan Anganwadi Centre-a chin dan tha tak takte uar lehzuala kalpui turin kalkhawmte a sawm a ni.

<><><>

KOLASIB LAND OWNERS ASSN

Kolasib District Land Owners' Association (KDLOA)-in tukin dar 6:30 atanga NH 06 leh NH 306 dan chah an tum chu chhan hrang hrang avangin vawiin tlai dar 3:30 khan tiam chin awm lovin an ti tawp a, Kolasib DC leh Senior SP, Kolasib te chuan hriatpuina hming an ziah hnan ve bawk.

JAC, LOA Kolasib District ten demand an siam chungchangah Chief Secretary Renu Sharma hovin vawiin khan thuineitute an thukhawm a, Supreme Court in ram chungchanga buaina chingfel tura state sawrkar a hriattir chu chak taka hmalak ani tih an hriat avangin ram neitute hian an nawrh chu tiam chin awm lovin tih tawp an rel ta a ni.

Kolasib District Land Owners' Association ten Mizoram leh Silchar inkar kawngpui dan an tumna lamah hian vawiin chawhma lamah khan police nen an innawr buai a, hliam tenau tuar an awm nual nia thudawn a ni.

Puan tawh angin KDLOA hian lungawilohna lantir nan Sethawn a RTP Farm-ah lirthei dan chah an tum a, Ram neitu sang 2 chuang intelkhawm Kolasib District Land Owner's Association hian kum 3 chuang hma la thei lova an ram khuahkhirhna chu sut thuai se an duh tih an thuchhuahah an tarlang a. Ram neitu nihna chingfel thuai tura sawrkar phutin RRF Notification 1965 chu ram hmasawna daltu a nih thu leh thiah ni se an tih thu an sawi a. Four Lane Project pawh tihlawhtling tura phutin heng an thil phut hrang hrang te ngaih pawimawh a hlawh theih nan Silchar leh Aizawl inkar kawng hi dan an tum a ni.

Forest Minister Pu Lalthansanga chuan Kolasib District Land Owner's Association ten ram neitu nihna chingfel tura sawrkar an phut chungchangah sawrkarin an harsatna sutkian tumin theihtawp a chhuah a ti a,

Minister sawi dan chuan, Thawhtanni kalta khan ram neitute nen thukhawmin an harsatna sukiang tura hma a lak dan sawrkarin a hriattir, a ti a. Kawng dan an tum chu thulh turin a ngen tih sawiin Roadside Reserve Forest Notification (1965) chungchangah Supreme Court-in Gauhati High Court hnena a thupek chu nghak turin a ngen tih a sawi bawk.

Tun hnai khan Supreme Court chuan Gauhati High Court hnenah thupek chhuahin Forest Department in an appeal chungchangah thla thum chhunga thutlukna siam turin a hriattir a, Court chuan Mizoram Chief Secretary-in Mizoram sawrkara Forest leh Revenue Department-a Secretary-te nen thukhawmin department pahnih inkara buaina awm chu chingfel turin a thu a pe bawk a ni.

<><><>

RS MP

Rajya Sabha MP Pu K Vanlalvena'n sorkar laipuiin kuhva chin a khap lo tih a sawi a, Mizorama kuhva chingtute leh chin zel tumtute tan mangan na tur a awm lo a ti.

Vawiina Aizawl Press Club-a thuthar thehdarhtute a kawmnaah Pu K Vanlalvena chuan Chief Minister Pu Lalduhoma'n tun hnaia Assembly session-a a thusawiah Sorkar laipuiin kuhva chin a khap tawh ni awma a sawi avangin Mizorama kuhva chingtute leh chin tuma hma la mektute manganna tawh thu Union Agriculture Minister Shivraj Kumar Chouhan a sawipui a, chutianga khapna thupek chu Central sorkarin a lo siam anih chuan an thupek sut leh turin a ngen nghal tih a sawi a, Union Minister chuan chutianga kuhva chin khapna thuchhuah chu Central sorkarin a chhuah loh thu leh chutiang thuthang chu thu dik lo a nih thu a hrilh thu a sawi a ni.

Rajya Sabha MP chuan Commissioner of Horticulture Prabhat Kumar pawhin Kuhva chin khapna thupek Central sorkarin engmah thuchhuah a neih loh thu a sawi thu tarlang bawkin, Mizorama kuhva chingtute leh chin zel tumtute tan manganna tur a awm lo tih a sawi bawk.

MP Pu Vanlalvena chuan Nikum October ni 6 a Mizoram puma a MPLAD fund thawk tura a thlan chhuahte chu a kalhmang tih danglam anih avangin pawhtlai a ni a, amaherawhchu an pawhtlai chhan pawh chinfel anih hnuah DC office thenkhat leh BDO office then khat ten tun thlenga MP LAD fund thawk tura Work Order an la pe chhuak thei lo chu a ngaimawh tih a sawi a, kum hlui 2023-2024 MP fund la thawh zawh loh hian kum thar MP fund 2024-2025 lo chhuak tur a dal tlat tih a sawi a ni.

<><><>

AICC JOINT SECY

All India Congress Committee Joint Secretary Matthew Anthony chuan Rahul Gandhi, India Parliament-a Opposition Leader a nih avangin BJP sorkar chuan hlauin, mipuiin duhloh dan kaltlang luh pui an tum tam tak chu an hnuklet leh a ti.

Matthew Anthony chuan vawiin khan Aizawlah thuthar thehdarhtute kawmin, Real Estate Indexation Benefit, Long Term Capital Gains Tax, Lateral Recruitment Drive for the Senior Level Recruitments leh The Broadcasting Services (Regulation) Bill, 2024 te chu hnuhlet leh a ni tih sawiin, Sorkar laipui, Prime Minister leh Home Minister-te chu Manipur state chhanchhuah kawngah an hlawhchham vek tih a sawi bawk a, Congress Party Leader Rahul Gandhi chuan buaina chhuah atangin Manipur chu vawi thum a tlawh tawh thu a sawiin, hei hian an party chuan Manipur-a remna siam a tum tih a tilang chiang hle tih a sawi bawk a ni.

<><><>

J&K ELECTION

Jammu and Kashmir Assembly inthlan thawhnhniha atan vawiin khan vote thlak a ni a. Hriattheih chinah tlai dar 3 thleng khan vote zaa 46.12 a tla a. Inthlan thawhnhnihaah hian Assembly bial 26 ah inthlan tur niin polling station sang thum leh 502 siam a ni a. Heng zingah hian khawpuiah 1056 leh thingtlangah 2446 a tel. Inthlan buaipui tur hian mi sing 1 leh sang 3 chuang ruat an ni bawk. Inthlan thawh nhnihaah hian candidate 239 awmin voter nuai 25.78 an awm a ni.

Boruak ralmuang tak hnuaiha inthlan anih theih nan venhimna pawh khauh taka kalpui a ni a. Polling station zawng zawngah hian webcasting khawl dah vek a ni bawk. Puan tawh angin Jammu & Kashmir ah hian Assembly inthlan hi

thawhthuma neih tur a ni a. Thawh khatna hi tun thla ni 18 khan neih a ni tawh a. Vawiinah thawh hnihna zawh fel a ni ang a, thawh thumnaah hian Assembly seat 40 ah October ni 1 ah vote thlak a ni ang. Inthlana vote tla te hi October ni 8 ah chhiar tura ruahman a ni.

<><><>

ASIA POWER INDEX

Asia Power Index tarlan danin India chu Asia-a ram thiltithei pathumna a ni tawh. India chuan Japan lehpelin pathumna dinhmun a hauh a, kum 2024 report thar berah hian COVID-19 hrilen zawh hnua eibar dinhmun lamah a theihna 4.2 laia a pun avangin pathumnaah a kai phah ta a ni. Report-a tarlan anih danin India hian hmasawna hmanrua leh thildangah pawh 8.2 lain a san belh a. Asia ramdangte ang lo takin India rama thalai tam tak awm chuan hmasawna kawngah kum 10 lo awm tur chhungin ram dang a khum thei dawn nia chhut a ni.

Asia Power Index ah hian ram 27 te endik an ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>